



Broj: 01-50-1-15-40/08  
Sarajevo, 19. 11. 2008.

**ZAPISNIK  
40. sjednice Predstavničkog doma  
Parlamentarne skupštine Bosne i Hercegovine,  
održane 19. 11. 2008. godine**

Sjednica počela 15,15 sati. Prisustvovalo je 35 poslanika. Opravdano su odsustvovali: Halid Genjac, Šemsudin Mehmedović, Ekrem Ajanović, Mehmed Suljkanović, Zlatko Lagumdžija, Jovan Todorović i Milorad Živković.

Iz Vijeća ministara BiH sjednici su prisustvovali ministri Sredoje Nović i Dragan Vrankić, te zamjenik ministra sigurnosti Mijo Krešić.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, NATO-a, EUPM-a, američke i britanske ambasade, te nevladine organizacije Centri civilnih inicijativa.

Na početku sjednice, u okviru prethodnog pitanja, predsjedavajući je obavijestio Dom o tome šta je preduzeto u vezi s inicijativama Huseina Nanića – da se u dnevni red uvrsti Informacija Vijeća ministara BiH o spremnosti institucija BiH za preuzimanje obaveza u vezi s primjenom Sporazuma o stabilizaciji i pridruživanju, te Remzije Kadrića – za sazivanje posebne sjednice Predstavničkog doma sa samo jednom tačkom – Rasprava povodom sporazuma – zajedničke izjave Čović-Tihić-Dodik.

Predsjedavajući je rekao da je u vezi s inicijativom Huseina Nanića zatražen odgovarajući materijal za raspravu, te da će biti uvrštena u dnevni red čim on bude dostavljen.

Za inicijativu Remzije Kadrića predsjedavajući je rekao da nije dostavljena u skladu s Poslovníkom, jer, u skladu s članom 62. stav (3) zahtjev, treba da potpiše najmanje 10 poslanika ili većina članova Kolegija.

Predsjedavajući je također rekao da je poslaničko pitanje Jozе Križanovića u vezi sa uslovima rada u skupštinskoj sali proslijeđeno službama radi dostavljanja cjelovitog odgovora.

Poslije iznošenja prethodnih pitanja, predsjedavajući je obrazložio izmjene i dopune prijedloga dnevnog reda, koje su usaglasili Kolegij i Prošireni kolegij Doma. Izvršene su sljedeće izmjene i dopune prijedloga dnevnog reda:

- S dnevnog reda skinut je Prijedlog zakona o Agenciji za informaciono društvo BiH u drugom čitanju, jer je Komisija za saobraćaj i komunikacije dostavila obavještenje da je na sjednici održanoj 18 novembra, istovremeno zaključila da je potrebno obaviti dodatne konsultacije.

U dnevni red uvrštene su nove tačke:

- Zahtjev Vijeća ministara BiH za razmatranje Prijedloga zakona o dopunama Zakona o porezu na dodatu vrijednost po hitnom postupku, u skladu s članom 127.
- Zahtjev poslanika Bajazita Jašarevića za razmatranje Prijedloga zakona o izmjenama Zakona o javnim nabavkama po hitnom postupku, u skladu s članom 127.
- Izjašnjavanje Doma o određivanju novog roka za dostavljanje izvještaja ili o obustavi zakonodavnog postupka po Prijedlogu zakona o Agenciji za razvoj informacionog društva BiH,
- Izjašnjavanje Doma o određivanju novog roka za dostavljanje mišljenja ili o obustavi zakonodavnog postupka po Prijedlogu zakona o fiskalnim kasama, predlagač zakona: poslanik Jozo Križanović,
- Izbor članova Upravnog odbora Agencije za razvoj visokog obrazovanja i osiguranja kvaliteta, rang-lista Vijeća ministara BiH,
- Zahtjev Ustavopravne komisije Doma za davanje ovlaštenja za utvrđivanje prečišćenog teksta Zakona o Sudu BiH i Zakona o Tužilaštvu BiH i

- Davanje saglasnosti za ratifikaciju:
  - a) Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austria Kreditanstalt, Projekat izgradnje vodovoda Fojnica – Kiseljak i kanalizacionog kolektora Lepenica – Kiseljak,
  - b) Sporazuma između Bosne i Hercegovine i Vijeća ministara Republike Albanije o recipročnom unapređenju i zaštiti investicija,
  - c) Ugovora o finansiranju između Bosne i Hercegovine i Federacije BiH i Evropske investicione banke, Projekat vodovoda i kanalizacije u Federaciji BiH,
  - d) Evropskog sporazuma o dostavljanju molbi za pravnu pomoć.

U raspravi o prijedlogu dnevnog reda izneseni su sljedeći prijedlozi:

**Selim Bešliagić** je, u ime Kluba SDP-a, predložio da se s dnevnog reda skinu poslanička pitanja i odgovori, s obzirom da je prije ove bio nastavak 39. sjednice i da će poslanička pitanja i odgovori oduzeti dosta vremena.

**Denis Bećirović** predložio je da se u dnevni red, kao druga tačka, uvrsti tačka: Razmatranje Rezolucije Evropskog parlamenta o BiH, usvojene na plenarnoj sjednici 23. oktobra 2008. u Strazburu. Nakon što je obrazložio prijedlog, dodao je da, ako nije moguće da se ova tačka uvrsti u dnevni red ove, da se uvrsti kao prva tačka naredne sjednice Doma.

**Branko Dokić** predložio je da se 8. tačka: Finansijski izvještaji Radio-televizije BiH na dan 31.12.2007., s Mišljenjem ovlaštenog revizora, skine s dnevnog reda, rekavši da Upravni odbor treba da dostavi Izvještaj o poslovanju Javnog RTV servisa, pa bi se moglo istovremeno raspravljati i o ovom izvještaju.

**Husein Nanić** predložio je da se u dnevni red uvrsti tačka: Prijedlog zaključka o izradi plana aktivnosti na rješavanju smještaja institucija BiH, iznijevši i sadržaj prijedloga zaključka.

**Slavko Jovičić** iznio je inicijativu da Kolegij Doma, zajedno s Kolegijem Doma naroda, sazove posebnu sjednicu s jednom tačkom dnevnog reda: Privredna i ekonomska situacija u BiH, odnosno ekonomska recesija i kolaps bankarskog sistema u mnogim državama svijeta i Evrope i refleksije tog stanja na BiH, odnosno na privredu i ukupno ekonomsko stanje u ovoj zemlji. Opširno je obrazložio svoj prijedlog.

U okviru rasprave o prijedlogu dnevnog reda, a povodom prijedloga Denisa Bećirovića, **Azra Hadžiahmetović** podsjetila je da je Parlamentarna skupština Vijeća Evrope, povodom rasprave o monitoring izvještaju, usvojila Rezoluciju Parlamentarne skupštine Vijeća Evrope, te da se može očekivati da će biti preporuka i sa zasjedanja Vijeća za provođenje mira, koje se održava danas. Kazala je da bi bilo dobro da se što prije objedini rasprava o sva tri ova dokumenta.

**Šefik Džaferović** podsjetio je da je Ustavnopravna komisija, na zahtjev Kolegija, održala informativnu sjednicu na kojoj su pribavljene informacije i obavljena saslušanja o borbi protiv korupcije i organiziranog kriminala. Rekao je da je Komisija dostavila izvještaj s prijedlogom određenih zaključaka i predložio da se taj izvještaj uvrsti u jednu od narednih sjednica Doma.

**Branko Dokić** podržao je prijedlog Azre Hadžiahmetović i dodao da bi na tu sjednicu trebalo pozvati sve članove delegacije Parlamentarne skupštine BiH u Vijeću Evrope i obaviti cjelovitu raspravu o poziciji BiH u Vijeću Evrope, o našim obavezama, o ispunjavanju uslova BiH i kad je u pitanju samo članstvo i slično.

U raspravi o prijedlogu dnevnog reda **Momčilo Novaković** izrazio je dilemu da li je moguće s dnevnog reda skidati obavezne tačke. Zatim je prigovorio što ne dobiva materijale na srpskom jeziku, posebno one koje dostavlja Vijeće ministara BiH.

**Remzija Kadrić** komentirao je stav Kolegija o njegovom zahtjevu za posebnu sjednicu i dodao da je on to uputio kao inicijativu kako bi Kolegij sazvaio sjednicu u skladu s članom 62. stav (3) Poslovnika.

Sumirajući raspravu o prijedlogu dnevnog reda, predsjedavajući Doma Niko Lozančić konstatirao je:

- Prijedlog Selima Bešliagića za skidanje tačke Poslanička pitanja i odgovori obavezna je tačka;
- Prijedlog Denisa Bećirovića bio je alternativan – za ovu ili narednu sjednicu, pa će ta tačka biti uvrštena u dnevni red naredne sjednice kako bi bila bolje pripremljena;

- Prijedlog Branka Dokića za skidanje 8. tačke je neprihvatljiv jer se radi o obaveznoj tački;
- Prijedlog Huseina Nanića će također biti uvršten u dnevni red naredne sjednice;
- Inicijativa Slavka Jovičića bit će razmatrana na sjednici Kolegija;
- Prijedlozi Azre Hadžiahmetović i Šefika Džaferovića – također za narednu sjednicu i
- Prijedlog Branka Dokića za pozivanje članova delegacije imat će se u vidu kada se bude raspravljalo o pomenutim pitanjima.

Nakon iznošenja ovih konstatacija, predsjedavajući je rekao da nema novih tačaka za ovu sjednicu, pa je konstatirao da 40. sjednica Predstavničkog doma ima sljedeći

### D N E V N I R E D

1. Poslanička pitanja i odgovori;
2. Zahtjev Vijeća ministara BiH za razmatranje Prijedloga zakona o izmjenama i dopunama Zakona o osiguranju depozita u bankama BiH po hitnom postupku, u skladu s članom 127. Poslovnika;
3. Zahtjev Vijeća ministara BiH za razmatranje Prijedloga zakona o dopunama Zakona o porezu na dodatu vrijednost po hitnom postupku, u skladu s članom 127. Poslovnika;
4. Zahtjev poslanika Bajazita Jašarevića za razmatranje Prijedloga zakona o izmjenama Zakona o javnim nabavkama po hitnom postupku, u skladu s članom 127. Poslovnika;
5. Prijedlog zakona o zaštiti i dobrobiti životinja (prvo čitanje);
6. Izjašnjavanje Doma o određivanju novog roka za dostavljanje izvještaja ili o obustavi zakonodavnog postupka po Prijedlogu zakona o Agenciji za razvoj informacionog društva BiH;
7. Izjašnjavanje Doma o određivanju novog roka za dostavljanje mišljenja ili o obustavi zakonodavnog postupka po Prijedlogu zakona o fiskalnim kasama (predlagač Zakona: poslanik Jozo Križanović);
8. Finansijski izvještaji Radio-televizije BiH na dan 31.12.2007., s Mišljenjem ovlaštenog revizora;
9. Informacija o stanju u oblasti imovinskih delikata u Bosni i Hercegovini, s naglaskom na krivično djelo otuđenja vozila u 2006. i 2007. godini i u prvih šest mjeseci 2008. godine;
10. Prijedlog zaključaka povodom Informacije o krivičnim djelima protiv života i tijela, s naglaskom na nasilje u porodici za 2006. i 2007. godinu te tendencijama u prva tri mjeseca 2008. godine;
11. Aktuelna sigurnosna situacija u BiH, s posebnim osvrtom na terorizam (po zaključku sa 39. sjednice Doma - na prijedlog Kluba SNSD-a i Kluba SDPBiH);
12. Analiza stanja u Projektu CIPS s posebnim osvrtom na izdavanje lažnih dokumenata;
13. Izvještaj Zajedničke komisije za usaglašavanje prijedloga za imenovanje ombudsmena u Instituciju ombudsmena za ljudska prava BiH;
14. Izvještaj Zajedničke komisije za usaglašavanje prijedloga za imenovanje zamjenika generalnog revizora;
15. Izbor članova Upravnog odbora Agencije za razvoj visokog obrazovanja i osiguravanje kvaliteta (Rang-lista Vijeća ministara BiH);
16. Zahtjev ustavnopravnih komisija oba doma za davanje ovlaštenja za utvrđivanje prečišćenog teksta Zakona o Sudu BiH i Zakona o Tužilaštvu BiH;
17. Davanje saglasnosti za ratifikaciju:
  - a) Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austria CREDITANSTALT – Projekat izgradnje vodovoda Fojnica - Kiseljak i kanalizacionog kolektora Lepenica – Kiseljak,
  - b) Sporazuma između Bosne i Hercegovine i Vijeća ministara Republike Albanije o recipročnom unapređenju i zaštiti investicija,
  - c) Ugovora o finansiranju između Bosne i Hercegovine i Federacije BiH i Evropske investicione banke – Projekat vodovoda i kanalizacije u Federaciji BiH,
  - d) Evropskog sporazuma o dostavljanju molbi za pravnu pomoć.

## Ad. 1. Poslanička pitanja i odgovori

Predsjedavajući Lozančić konstatirao je da su za ovu sjednicu odgovore na pitanja dobili:

- Denis Bećirović – od Vijeća ministara BiH, na pitanje postavljeno na 31. sjednici,
- Mehmed Suljkanović – od Vijeća ministara BiH, na pitanje postavljeno na 33. sjednici,
- Azra Alajbegović – od Vijeća ministara BiH, na pitanje postavljeno na 34. sjednici,
- Milorad Živković – od Ministarstva vanjskih poslova BiH, na pitanje postavljeno na 35. i 38. sjednici,
- Niko Lozančić - od Centralne izborne komisije BiH, na pitanje postavljeno na 36. sjednici,
- Velimir Jukić - od Obavještajno-sigurnosne agencije BiH i Centralne izborne komisije BiH, na pitanje postavljeno na 38. sjednici i
- Branko Dokić – od Ministarstva vanjskih poslova BiH, na pitanje postavljeno na 38. sjednici.

U okviru komentara Branko Dokić rekao je da ima pitanja koja je i prije dva mjeseca postavio a da nije dobio odgovor. Zatražio je da se ažurira dostavljanje odgovora na pitanja.

Postavljena su nova pitanja kako slijedi:

### Rifat Dolić:

„Kakav je stav Vijeća ministara BiH i resornog ministarstva o arheološkom otkriću Piramida sunca u Visokom? Da li o tom arheološkom otkriću postoje neka oficijelna mišljenja institucija vlasti i naučnih institucija u BiH? Da li su institucije vlasti i naučne institucije BiH na bilo koji način trenutno ili do sada učesnici rasprava o naučnom valoriziranju ovog otkrića i nije li to pitanje neopravdano omalovaženo i marginalizirano tako da se stiče utisak da je drugima više stalo da tamo nešto postoji, nego li nama u BiH kojima bi to daleko više značilo? Kakav je sada pravni, kulturološki i historijski status Piramida sunca u Visokom?“

### Sadik Bahtić:

„1. Kada će Vijeće ministara BiH izabrati ili imenovati direktora Direkcije evropskih integracija BiH pošto je sadašnji direktor imenovan za ambasadora BiH u Briselu?“

2. Kada će imenovani ambasador BiH u EU – Brisel stupiti na dužnost?“

„3. Po kojem propisu i ko sve ima pravo na ličnu zaštitu i da li ta lica imaju pravo na pojačanu dodatnu zaštitu nakon medijskih špekulacija o njihovoj navodnoj ugroženosti i koliko to sve košta ovu državu?“

### Remzija Kadrić:

„Kakav je nacionalni sastav i sastav nacionalnih manjina zaposlenih u Generalnom sekretarijatu Vijeća ministara BiH, te ako ima neravnomjerne zastupljenosti, šta se planira učiniti kako bi se ona otklonila?“

### Denis Bećirović:

„Koji su poslanici/delegati u Parlamentarnoj skupštini BiH, od 1.12.2007. do 1.12.2008., boravili u inozemstvu, s posebnim napomenama o:

- terminima putovanja,
- lokacijama putovanja,
- troškovima putovanja (pojedinačno po poslaniku/delegatu).“

### Azra Alajbegović:

„Ja imam također jedno vrlo kratko pitanje koje će se nadovezati i bit će kompletan izvještaj za ovaj dom a to je – da rukovodstvo Doma također dostavi koji poslanici su bili pozivani i kojim poslanicima je dozvolio Kolegij određena službena odsustva u svrhu obavljanja njihove poslaničke dužnosti, članstva u određenim tijelima Doma a da to nisu htjeli ili su izričito odbili. Jer ćemo samo u toj situaciji imati zapravo jednu kompletnu informaciju.“

**Ad. 2. Zahtjev Vijeća ministara BiH za razmatranje Prijedloga zakona o izmjenama i dopunama Zakona o osiguranju depozita u bankama BiH po hitnom postupku, u skladu s članom 127. Poslovnika**

Poslije kratkih uvodnih napomena nije bilo rasprave o zahtjevu.

Prilikom glasanja, sa 30 glasova "za" (Federacija BiH 21, RS devet) i tri "protiv", usvojen je zahtjev za hitni postupak.

Zatim je, sa 33 glasa "za" (Federacija BiH 21, RS 12), usvojen Zakon o izmjenama i dopunama Zakona o osiguranju depozita u bankama BiH.

**Ad. 3. Zahtjev Vijeća ministara BiH za razmatranje Prijedloga zakona o dopunama Zakona o porezu na dodatu vrijednost po hitnom postupku, u skladu s članom 127. Poslovnika**

Uvodne napomene dao je predsjedavajući.

Nije bilo rasprave.

Prilikom glasanja, zahtjev za hitni postupak usvojen je sa 30 glasova "za" (Federacija BiH 21, RS devet) i tri "protiv".

Poslije glasanja o zahtjevu, usvojen je i Prijedlog zakona o dopunama Zakona o porezu na dodatu vrijednost. "Za" je glasalo 28 (Federacija BiH 18, RS 10), "protiv" jedan, "suzdržala" su se dva poslanika.

**Ad. 4. Zahtjev poslanika Bajazita Jašarevića za razmatranje Prijedloga zakona o izmjenama Zakona o javnim nabavkama po hitnom postupku, u skladu s članom 127. Poslovnika**

Uvodne napomene dao je predsjedavajući Lozančić.

Nije bilo rasprave.

Prilikom glasanja, zahtjev za hitni postupak nije dobio entitetsku većinu. "Za" hitni postupak glasala su 22 poslanika (iz Federacije 19, iz RS tri), "protiv" je glasalo devet, "suzdržala" su se dva poslanika.

Predsjedavajući je konstatirao da će se o zahtjevu provesti usaglašenje u Kolegiju kao komisiji.

**Ad. 5. Prijedlog zakona o zaštiti i dobrobiti životinja (prvo čitanje)**

Nije bilo rasprave poslije uvodnih napomena predsjedavajućeg.

Tokom glasanja, sa 26 glasova "za" (Federacija BiH 20, RS šest), jednim "protiv" i šest "suzdržanih", usvojen je Prijedlog zakona u prvom čitanju.

**Ad. 6. Izjašnjavanje Doma o određivanju novog roka za dostavljanje izvještaja ili o obustavi zakonodavnog postupka po Prijedlogu zakona o Agenciji za razvoj informacionog društva BiH**

U uvodnim napomenama predsjedavajući je podsjetio da nadležna komisija nije do krajnjeg roka koji je odredio Kolegij dostavila izvještaj o Prijedlogu zakona o Agenciji za razvoj informacionog društva BiH, te da je Komisija, u skladu s Poslovníkom, od Doma zatražila produženje roka do 1.12.2008.

Nije bilo rasprave.

Prilikom glasanja Dom je, sa 27 glasova "za" (Federacija BiH 19, RS osam), tri "protiv" i jednim "suzdržanim", odobrila produženje roka do 1.12.2008. do kojeg će Komisija za saobraćaj i komunikacije dostaviti Izvještaj o Prijedlogu zakona o Agenciji za razvoj informacionog društva BiH.

**Ad . 7. Izjašnjavanje Doma o određivanju novog roka za dostavljanje mišljenja ili o obustavi zakonodavnog postupka po Prijedlogu zakona o fiskalnim kasama (predlagač zakona: poslanik Jozo Križanović)**

Poslije uvodnih napomena predsjedavajućeg, nije bilo rasprave ni o ovoj tački.

Prilikom glasanja, predsjedavajući je rekao da nadležna komisija nije u zahtjevu navela do kojeg datuma traži produženje roka, pa je iznio prijedlog Kolegija da se rok produži do 1.12.2008.

Ovaj prijedlog usvojen je sa 32 glasa "za" (Federacija BiH 20, RS 12) i jednim "suzdržanim".

**Ad. 8. Finansijski izvještaji Radio-televizije BiH na dan 31.12.2007., s Mišljenjem ovlaštenog revizora**

U uvodnim napomenama, predsjedavajući Lozančić podsjetio je na Mišljenje Komisije za saobraćaj i komunikacije i zaključke koji su u Mišljenju predloženi.

Nije bilo rasprave.

U toku izjašnjavanja predsjedavajući je na glasanje dao Finansijske izvještaje, s Mišljenjem ovlaštenog revizora i Mišljenjem nadležne komisije sa zaključcima. "Za" je glasalo 19 poslanika (Federacija BiH 17, RS dva), tri "protiv", 11 se "suzdržalo".

Predsjedavajući je konstatirao da izvještaji i mišljenja nisu dobili entitetsku većinu i da slijedi usaglašavanje u Kolegiju kao komisiji.

**Ad. 9. Informacija o stanju u oblasti imovinskih delikata u Bosni i Hercegovini, s naglaskom na krivično djelo otuđenja vozila u 2006. i 2007. godini i u prvih šest mjeseci 2008. godine**

Predsjedavajući je u uvodnim napomenama rekao da je Ustavnopravna komisija prihvatila Informaciju iz ove tačke i isto predlaže i Domu.

Nije bilo rasprave.

Prilikom glasanja, Informacija je primljena k znanju, sa 28 glasova "za" (Federacija BiH 17, RS 11), jednim "protiv" i tri "suzdržana".

**Ad. 10. Prijedlog zaključaka povodom Informacije o krivičnim djelima protiv života i tijela, s naglaskom na nasilje u porodici za 2006. i 2007. godinu, te tendencijama u prva tri mjeseca 2008. godine**

U uvodnim napomenama predsjedavajući je podsjetio na Zaključak Doma, usvojen na 36. sjednici, na osnovu kojeg su Ustavnopravna komisija, Komisija za ostvarivanje ravnopravnosti spolova, Zajednička komisija za ljudska prava, prava djeteta, mlade imigraciju, izbjeglice i etiku i Parlamentarnu grupu za populaciju i razvoj dostavile prijedlog zaključaka iz ove tačke.

Nije bilo rasprave.

Prilikom glasanja, sa 31 glasom "za" (Federacija BiH 19, RS 12) i dva "suzdržana", usvojeni su sljedeći

**Z A K L J U Č C I**

1. Predstavnički dom PSBiH konstatira da je nasilje u porodici u značajnom porastu te da predstavlja veliki društveni problem;
2. Predstavnički dom PSBiH poziva nadležne institucije na primjenu mjera predviđenih Rezolucijom o borbi protiv nasilja nad ženama u porodici Parlamentarne skupštine BiH („Sl. glasnik BiH“, br. 15/08), naročito uključujući obavezu usvajanja odgovarajućih zakonodavnih i budžetskih mjera, te na osiguravanje efikasne primjene već usvojenih zakona i mjera, a posebno osiguravanje bržeg pristupa sudovima, kao i efektivno izricanje zaštitnih mjera i uspostavljanje objekata za podršku žrtvama nasilja u porodici i njihovo finansiranje, te obuku osoblja u zdravstvu, policiji, pravosuđu, socijalnim i obrazovnim ustanovama;
3. Konstatira se da su ustanove za socijalnu zaštitu u Bosni i Hercegovini materijalno i kadrovski neadekvatno opremljene te da ne mogu uspješno odgovoriti svom zadatku kada je

u pitanju postupanje u slučajevima nasilja u porodici, pa je neophodno utvrditi i provoditi mjere za njihovo jačanje;

4. Predstavnički dom PSBiH traži od Vijeća ministara BiH da, do kraja 2008. godine, podnese Parlamentarnoj skupštini BiH na usvajanje Prijedlog strategije za prevenciju i borbu protiv nasilja u porodici, nasilja na osnovu spola, seksualnog uznemiravanja i uznemiravanja u Bosni i Hercegovini, te da najmanje jednom godišnje izvještava PSBiH o njenom provođenju.

#### **Ad. 11. Aktuelna sigurnosna situacija u BiH, s posebnim osvrtom na terorizam (po zaključku sa 39. sjednice Doma - na prijedlog Kluba SNSD-a i Kluba SDPBiH)**

U uvodnim napomenama predsjedavajući je rekao da je, na traženje Kolegija, Ministarstvo sigurnosti BiH u pisanoj formi dostavilo informaciju za ovu tačku dnevnog reda.

U okviru ove tačke u raspravi su učestvovali: Bakir Izetbegović, Slavko Jovičić, Beriz Belkić, Jozo Križanović, Denis Bećirović, Drago Kalabić, Mirko Okolić i Momčilo Novaković.

Prilikom glasanja Dom se prvo izjasnio o prijedlogu zaključka Momčilo Novakovića – **da se Informacija vrati Ministarstvu sigurnosti BiH radi razmatranja na sjednici Vijeća ministara BiH, nakon čega bi bila razmatrana na sjednici Doma.** "Za" prijedlog ovog zaključka glasalo je 17 (iz Federacije BiH sedam, iz RS 10), a "protiv" je glasalo 16 poslanika.

Predsjedavajući je konstatirao da prijedlog zaključka nije dobio entitetsku većinu i da slijedi usaglašavanje u Kolegiju kao komisiji, a nakon toga će se glasati o ostalim materijalima iz ove tačke.

#### **Ad.12. Analiza stanja u Projektu CIPS, s posebnim osvrtom na izdavanje lažnih dokumenata**

Predsjedavajući je u uvodnim napomenama rekao da je Ministarstvo finansija i trezora BiH, na traženje Kolegija, dostavilo informaciju za ovu tačku dnevnog reda.

U raspravi su učestvovali: Selim Bešliagić, Bakir Izetbegović, Husein Nanić, Šefik Džaferović, Lazar Prodanović i Niko Lozančić.

Govorio je i ministar civilnih poslova BiH Sredoje Nović, koji je, uz ostalo, odgovorio i na pitanja postavljena u raspravi.

Prilikom glasanja, sa 30 glasova "za" (Federacija BiH 19, RS 11), jednim "protiv" i jednim "suzdržanim", Dom je primio k znanju Informaciju Ministarstva civilnih poslova BiH.

Zatim je predsjedavajući na glasanje dao prijedlog zaključaka koje je u raspravi podnio predsjedavajući Kluba SDA Bakir Izetbegović, koji glase:

1. Zadužuje se Vijeća ministara BiH da analizira institucionalnu vezu organa koji vode upravni postupak i projekat CIPS koji vrši izdavanje dokumenata na bazi tog postupka, te predloži mjere kojima bi bilo spriječeno izdavanje lažnih dokumenata.
2. Traži se hitna primjena Zakona o Agenciji za identifikacione dokumente i razmjenu podataka, uključujući i raspisivanje konkursa za izbor novog rukovodstva u skladu sa Zakonom.
3. Traži se da, prilikom zapošljavanja u Agenciji, bude ispoštovana zakonska obaveza o nacionalnoj zastupljenosti zaposlenih, posebno kad je riječ o rukovodećim radnim mjestima.

"Za" prijedlog ovih zaključaka glasalo je 19 (iz Federacije BiH 17, iz RS dva), "suzdržalo" se 13 poslanika.

Predsjedavajući je konstatirao da zaključci nisu dobili entitetsku većinu, te da će se izvršiti usaglašavanje u Kolegiju kao komisiji.

#### **Ad. 13. Izvještaj Zajedničke komisije za usaglašavanje prijedloga za imenovanje ombudsmena u Instituciju ombudsmena za ljudska prava BiH**

Predsjedavajući je u uvodnim napomenama podsjetio na proceduru koja je provedena u vezi s imenovanjem ombudsmena u Instituciju ombudsmena za ljudska prava BiH. Podsjetio je na Izvještaj Zajedničke komisije, te da je Komisija usaglasila da se u Instituciju ombudsmena iz hrvatskog naroda

imenuje Ivo Bradvica, a iz bošnjačkog naroda Jasminka Džumhur. Također je podsjetio da su ranije oba doma iz srpskog naroda imenovali Ljubomira Sandića.

Martin Raguž je u raspravi rekao da je ovo jedan od najapsurdnijih izvještaja od kada je on poslanik u Predstavničkom domu. Članovi Zajedničke komisije iz ovog doma usaglasili su prijedlog preglasavanjem, a nisu stali iza odluke koju je ranije donio ovaj dom. Ja mislim da se to nije desilo niti će se desiti u parlamenarnoj praksi, pa neka ovdje ostane zabilježeno. Oni su odstupili od odluke ovog doma. O kandidatu kojeg je ovaj dom imenovao nije se ni glasalo. Ova stvar alarmanatno upozorava koliko se izašlo izvan okvira zakona i podleglo prisiscima, da se primijeni postupak usaglašavanja na ljude, a takav je postupak predviđen za usaglašavanje zakona. Najmanje što ovaj dom može uraditi jeste da odbije ovaj izvještaj. Ako ovaj izvještaj prođe, na ovome se proces neće završiti, rekao je Martin Raguž u raspravi o Izvještaju Zajedničke komisije.

U raspravi su još učestvovali: Remzija Kadrić, Momčilo Novaković, Jozo Križanović, Sefer Halilović i Drago Kalabić.

Remzija Kadrić skrenuo je pažnju na zaključak u Izvještaju Zajedničke komisije – kojim se od Ministarstva pravde BiH traži da dostavi mišljenje u pogledu valjanosti procedure Zajedničke komisije za usaglašavanje prijedloga za imenovanje ombudsmena za ljudska prava, dodavši da misli da je to trebalo uraditi prije provođenja procedure usaglašavanja.

Momčilo Novaković je također skrenuo pažnju na zaključak u Izvještaju Zajedničke komisije, dodajući da taj zaključak nema smisla i da misli da bi Izvještaj trebalo odbiti i cijelu proceduru ponoviti, kako bi u skladu sa zakonom došli do Institucije ombudsmena.

Jozo Križanović je u svojoj kratkoj diskusiji rekao: „Ja ću vrlo kratko, zapravo mogu samo reći da se u potpunosti slažem sa ovim što je govorio kolega Raguž. Dakle, bio bi ovo presedan da zajedničke komisije domova usaglašavaju personalna rješenja, odnosno imenovanja. Mislim da to nije u skladu sa našim poslovníkom i ja ću iz tog razloga biti protiv ovakvih prijedloga i protiv zaključka.

Sefer Halilović je, takođe u kratkoj diskusiji, rekao da bi samo htio podržati ovo što su već prije njega govorili Raguž i ostali poslanici. Dodao je da je više nego očigledno da procedure nisu poštovane i da će se doći u jednu poziciju, kada će se do ombudsmena doći na sudu, a to će nas udaljiti pola godine ili godinu dana od konačnog rješenja ovog pitanja.

Drago Kalabić rekao je da je OHR svojim pismima, zbog kojih često ovdje ustaju u ime OHR-a i traže stav, insistirao da se ovo u vezi s ombudsmenima završi. Kad je osnovana komisija, svi smo znali s čim ćemo se suočiti, svi su znali što je naš zadatak, ali su svi očekivali rezultat. Oni koji nisu dobili svoj rezultat, sada imaju tu argumentaciju. Dilema postoji, ja sam tu dilemu iznio i na Komisiji, ali istovremeno tražim da neko ponudi šta je izlaz, šta je alternativa. Mi nismo mogli naći bolji način i uradili smo što smo uradili, rekao je, uz ostalo, Drago Kalabić, govoreći kao član Zajedničke komisije za usaglašavanje.

Prilikom glasanja, Izvještaj Zajedničke komisije usvojen je sa 22 glasa "za" (Federacija BiH 14, RS osam) i 11 "protiv".

Predsjedavajući je konstatirao da su, usvajanjem Izvještaja Zajedničke komisije, u Instituciju ombudsmena za ljudska prava BiH imenovani Ljubomir Sandić iz srpskog naroda, Jasminka Džumhur iz bošnjačkog naroda i Ivo Bradvica iz hrvatskog naroda.

Također, usvajanjem Izvještaja, Dom je usvojio i sljedeći zaključak:

**Traži se od Ministarstva pravde BiH da dostavi mišljenje u pogledu valjanosti procedure Zajedničke komisije za usaglašavanje prijedloga za imenovanje ombudsmena za ljudska prava BiH.**

#### **Ad.14. Izvještaj Zajedničke komisije za usaglašavanje prijedloga za imenovanje zamjenika generalnog revizora**

U uvodnim napomenama predsjedavajući je rekao da je predmet usaglašavanja u Zajedničkoj komisiji bio zamjenik generalnog revizora BiH iz bošnjačkog naroda.

Nije bilo rasprave.

Prilikom glasanja, Izvještaj Zajedničke komisije usvojen je sa 22 glasa "za" (Federacija BiH 12, RS 10), osam "protiv" i dva "suzdržana".



Nakon usvajanja Izvještaja, predsjedavajući je konstatirao da je Dževad Nekić imenovan za zamjenika generalnog revizora iz bošnjačkog naroda, te podsjetio da je ranije za generalnog revizora u oba doma imenovan Milenko Šego, a za zamjenika generalnog revizora iz srpskog naroda Božana Trninić.

#### **Ad. 15. Izbor članova Upravnog odbora Agencije za razvoj visokog obrazovanja i osiguravanje kvaliteta (rang-lista Vijeća ministara BiH)**

U uvodnim napomenama predsjedavajući Lozančić podsjetio je na odredbe Zakona o visokom obrazovanju prema kojima se imenuje Upravni odbor Agencije, te rekao da je Kolegij zadužio Ustavnopravnu komisiju da dostavi mišljenje o prijedlogu Vijeća ministara BiH, ali da mišljenje do sada nije dostavljeno.

U raspravi o ovoj tački učestvovali su: Šefik Džaferović, ministar civilnih poslova BiH Sredoje Nović i Momčilo Novaković.

Prilikom glasanja, sa 23 glasa "za" (Federacija BiH 15, RS osam), šest "protiv" i četiri "suzdržana", Dom je usvojio rang-listu Vijeća ministara BiH, pa su tako u Upravni odbor Agencije za razvoj visokog obrazovanja izabrani:

- Mišo Kulić - na tri godine,
- Stevo Pašalić - na dvije godine,
- Darko Petković - na jednu godinu,
- Sabahudin Ekinović - na tri godine,
- Bakir Mehić - na dvije godine,
- Refik Šahinović - na jednu godinu,
- Ivo Rozić - na tri godine,
- Slavica Juka - na dvije godine,
- Siniša Skočibušić - na jednu godinu i
- Emina Hot-Šljuka - na tri godine.

#### **Ad. 16. Zahtjev ustavnopravnih komisija oba doma za davanje ovlaštenja za utvrđivanje prečišćenog teksta Zakona o Sudu BiH i Zakona o Tužilaštvu BiH**

Poslije uvodnih napomena predsjedavajućeg nije bilo rasprave.

Sa 30 glasova "za" (Federacija BiH 18, RS 12) i tri "suzdržana", Dom je dao ovlaštenje Ustavnopravnoj komisiji za utvrđivanje prečišćenog teksta Zakona o Sudu BiH i Zakona o Tužilaštvu BiH.

#### **Ad. 17. Davanje saglasnosti za ratifikaciju:**

- a) Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austria CREDITANSTALT – Projekat izgradnje vodovoda Fojnica - Kiseljak i kanalizacionog kolektora Lepenica – Kiseljak,
- b) Sporazuma između Bosne i Hercegovine i Vijeća ministara Republike Albanije o recipročnom unapređenju i zaštiti investicija,
- c) Ugovora o finansiranju između Bosne i Hercegovine i Federacije BiH i Evropske investicione banke – Projekat vodovoda i kanalizacije u Federaciji BiH,
- d) Evropskog sporazuma o dostavljanju molbi za pravnu pomoć.

U uvodnim napomenama predsjedavajući je rekao da je nadležna komisija dostavila mišljenja o aktima iz ove tačke i o njima dala pozitivno mišljenje.

Nije bilo rasprave.

Sa 32 glasa "za" (Federacija BiH 20, RS 12) i jednim "protiv", data je saglasnost za ratifikaciju akata od a) do d).

Ovim je realiziran dnevni red 40. sjednice.  
Sastavni dio Zapisnika je transkript sjednice.  
Sjednica je završena u 18,59 sati.

SEKRETAR  
PREDSTAVNIČKOG DOMA  
**Branka Todorović**

PREDSJEDAVAJUĆI  
PREDSTAVNIČKOG DOMA  
**Niko Lozančić**